

四庫全書

史部

欽定四庫全書

史部

建炎以來繫年要錄卷一百六十二

三

詳校官侍讀學士臣陸伯焜

侍讀臣孫球覆勘

謄錄監生臣范重榮

謄錄監生臣南光臧

欽定四庫全書

建炎以來繫年要錄卷一百六十二

宋 李心傳 撰

紹興二十有一年

歲次降未 盍海陵 陽王亮天德三年

春正月

按是月 癸酉朔

辛巳皇叔和州防禦使士勳為建州觀察使以積闕遷

也

癸未輔臣奏事畢上曰廬州守臣吳達上便民五事論
淮南復業之民宜寬恤涵養未可遽理租賦起上供其

令戶部展年收之

庚寅夜雪

癸巳將作監主簿范彥輝面對言州縣凡遇科催急於星火或寄外廊而專事侵偷或任攬納而專給虛鈔鈔簿不銷致多掛欠間過州郡催督嚴緊遂於民間多端掊率上戶則敦請赴縣待以酒殺而科借之中下之戶不與朱鈔故已納稅賦勒令再納又最其下細民則搜刷丁錢詭立名項曰補虧曰失收曰復撐曰排門或入

老不除或已除再籍臣聞祖宗朝行丁錢之法率三丁共敷七百七十文今一丁不下二丁而浮費稱是乃更重疊不已斯民破家竭產不得自存遂以進丁為諱於是子生不舉循習成風豈不辜陛下好生之意欲望申戒監司郡守應縣分催科至終限未及分數去處令本州差官下縣監催湏管及分方得離縣如出遠終限經兩月本州不差官下縣監催者自是本州失時檢察即不得更行追理如是則不惟州縣事辦且免書吏侵欺

而細民無摧剝之苦矣從之

甲午鎮東軍承宣使知閣門事幹辦皇城司鄭藻為保
信軍節度使領閣門事藻於顯肅后為最親以使北還
而有此命 左宣義郎曹筠知衢州筠自御史斥去會
衢州關守上諭秦檜曰臺諫無大過惡當優假之以來
言者於是用筠

乙未秦檜奏除潭廣帥臣上曰廣東帥臣及諸路提舉
市舶官皆當慎擇苟非其人則措置失宜海商往往不

至又曰布衣步孝友上書言丹陽練湖堙塞艱於漕運
可諭漕臣修治

丁酉詔翰林局醫生并奏試人並令試經義十二道以
六通為合格與補翰林醫學舊制以宰執初除轉廳恩
例試墨義三十道至是以奏試人不通文義故改法焉
戊戌少保昭化軍節度使醴泉觀使駙馬都尉潘正夫
以郊恩封和國公

庚子敷文閣直學士提舉佑神觀米友仁卒

二月壬寅朔勅令所刪定官魏師遜面對論比年遠邇豐穰而郡縣因米直之賤乃於輸納之時令民以苗米折錢捨其所有取其所無民必又下其直以糶所費何止一倍是豐年適為之病也望申敕州縣仍令監司覺察民戶越訴從之師遜江寧人也

癸卯殿中侍御史湯允恭論舉人假手之弊詔許同舉人陳首取旨免省

丁未詔知郢州喬大觀州學教授徐維並衝替自今不

得與堂除大觀坐對維及右中奉大夫通判州事魏彥
純進士晁公裔妄造語言謗訕朝政維坐冒法與大觀
用妓樂飲宴親聞謗訕事在有司猶敢傲慢相與濟惡
下本路帥司覈實乃有是命是日輔臣進呈上謂秦檜
曰趙鼎所引用多非其人檜曰范冲中間修哲宗皇帝
實錄委有妨嫌上曰祖宗時不委當時遷謫官修史恐
有謗言以欺後世也直祕閣知靜江府方滋陞直敷
文閣知廣州左朝散郎廣南西路轉運判官陳璠知靜

江府初朝廷命廣西帥臣即橫山寨市馬於羅殿自杞
大理諸蠻歲捐黃金五十鎰白金三百斤錦二百絕四
千廉州鹽二百萬斤而得馬千有五百匹良馬高五尺
率直中金五鎰他以是為差每五十疋為綱選使臣部
送至行在及建康鎮江府太平池州諸軍不顛斃于道
則有賞先是廬州之鹽分令欽橫賓貴潯梧藤象柳容
等州轉至橫山倉然諸州科民則苦富民差吏則雜私
販徃徃陷沒留滯至壽始令官支脚錢選使臣運鹽若

及十萬斤即與部良馬一綱至行在

廣馬事以熊克小
歷修入但克以為

紹興十九年十二
月事則甚誤也

壬子詔行在官私僦舍錢並減半違者坐以違制之罪
拘其業入官癸丑又詔白地錢亦減半

甲寅夜雨雹

乙卯詔諸州各置惠民局初軍器監丞齊旦面對乞令
州縣合藥散民上恐不能徧及故命戶部舉舊法行之
仍命毋多取利 權尚書戶部侍郎宋貺落權字仍兼

權知臨安府 大理少卿李如岡權尚書吏部侍郎秦

檜生辰如岡為百韻詩以獻檜喜乃有是命此以紹興二十七年

三月周方崇論如岡章疏修入

右中奉大夫直秘閣提舉台州崇道

觀王安道卒

壬戌直顯謨閣知婺州湯鵬舉陞直龍圖閣知潭州

詔端明殿學士簽書樞密院事巫伋充大金祈請使保

信軍節度使領閣門事鄭藻副之請歸皇族等事癸亥

伋等辭行

日歷只書巫伋鄭藻奉使大金朝辭進對而無使名李伋拜罷錄稱巫伋充大金祈請使

亦不云所請何事惟紹興三十一年五月二十日館伴使何備等劄子載北使王全上殿口奏云帝曾遣祈請使巫伋等來言及宗屬及增加帝號等事而趙姓之遺史所載又差詳語在今年九月末所書巫伋使還并注

秘書省著作佐郎林機守尚書禮部員外郎

甲子徽猷閣待制李正民卒

乙丑太府少卿徐宗說言方今經費所賴之大者經總制錢物為先舊守臣椿發歲終按其殿最賞罰後慮守臣侵用遂專委通判拘收令提刑司催督又立定對行賞罰條格近來人物繁庶酒稅日增宜其所收之數倍

多而反不及前日蓋緣對行賞罰之後州縣無緣肯供
最少之數是致合推賞之人例皆不得其賞自是人人
坐視而不恤比較之法徒為文具望令知通同共椿辦
通判專行拘收椿發以立定賞格知通均受庶幾人利
其賞錢物不致失陷詔戶部措置

己巳處州編管人王騰移送婺州編管以騰擅離貶所

上書狂妄欲起兵端故也

王騰本末
未見當考

庚午敷文閣待制提舉江州太平興國宮張宜卒

是月集英殿修撰提舉江州太平興國宮魏疇卒于衢
州自秦檜用事士大夫平日少失其意禍輒不測當始
議和時疇與檜異論檜嘗欲除近郡疇遜辭不就奉祠
十餘年寓居常山僧舍一室蕭然卒免於禍焉初趙鼎
既謫居嘗謂其客左奉議郎方疇曰自鼎再相除正府
外所引從官如常同胡寅張致遠張九成潘良貴呂本
中魏疇皆有士望異日決可保其無他疇曰願公徐觀
之其後諸人流落之久雖死不變疇乃信服

三月壬申朔右朝請郎侯恪知歸州代還言巴東興山
二邑舊無酒禁止令民戶送納麴錢昨緣招置義兵遂
官創兩務今義兵久已放散乞復舊法上曰四川酒課
昨緣軍興張浚用趙開創置隔槽今既罷兵可令戶部
取索措置

乙亥戶部侍郎宋貺言諸州多員外置官費耗寢廣重
困民力望日下並罷上曰此不惟耗公家且為民害宜
令戶部禁止

戊寅上謂大臣曰聞大金有詔去尊號前此士庶屢嘗有請朕却而不受秦檜曰盛德之事他國亦知師

丁亥上曰州縣多催理積欠民間重困朕頃在京東親覩其害可令戶部照年分蠲放既而戶部請自紹興十一年至十七年諸色拖欠錢物除形勢及公吏鄉司與第等以上上有力之家未納數外並與放免從之

戊子忠訓郎閣門祗候王德霖為武翼郎閣門宣贊舍人德霖進子特錄之

庚寅直寶文閣主管台州崇道觀秦埴直顯謨閣秦堪
並進職二等提點佑神觀以扶掖檜入朝特推恩也堪
除直天章閣而以稱呼不便為辭乃陞直龍圖閣

堪陞
職在

是月
丁丑

壬辰太常博士丁婁明面對言邇來諸路司間有以縣
令之貪殘者按劾以聞尋罷黜矣未見有以政績優異
敷奏于朝者望申飭監司詳加考察歲具殿最以聞詔
申嚴行下 中亮大夫建寧軍承宣使殿前司右軍統

制岳超落階官為利州觀察使以職事修舉特遷之也
癸巳右朝請大夫榮蕤知襄陽府 左朝散郎撫州州

學教授宋樸充諸王宮大小學教授樸當塗人好左道
每與方士游樞密院統領丁祺薦之秦熺力加引拔於

是檜驟用之

此以葉義問
章疏修入

丁酉監察御史林大鼎面對言祖宗於字人之選其格
尤密比者改官者多作丞關陞者多作幕職今尚左知
縣關一百三十五侍左縣令關一百一十二合入者既

擇祿而不願未應入者願宣力而無由至於鹽場侍左見有三十餘闕久榜不銷祇為監司郡守差權官之奇貨願並與破格差注一次詔吏部措置既而吏部乞以

淮寧知縣等三色闕共一百三十七與破格差從之

吏部

奏下在六月甲戌吏部所奏稱臣僚劄子乞將知縣縣令鹽場共二百七十八闕破格差注一次即指此三色

也熊克小歷節去鹽場一項今稍詳之

戊戌宗正丞王葆轉對言陛下修德睦鄰感召和氣年穀屢豐今常平司既不能因時糴買以廣蓄而州縣秋

苗乃高立米價抑民納錢望嚴折錢之令講平糶之方
庶幾農末不病詔付戶部

夏四月甲辰起居舍人權直學士院王囑權尚書禮部
侍郎以使還遷也 權尚書兵部侍郎王會落權字

乙巳祕書少監湯思退試起居舍人權直學士院 權
尚書禮部侍郎兼侍講陳誠之權刑部侍郎韓仲通並
落權字 端明殿學士知宣州楊愿陞資政殿學士以
愿首修中興聖統故也

己酉閬州觀察使帶御器械潘端卿降授郢州防禦使
端卿不赴後殿起居為閣門所彈故有是命

虞戍禮部侍郎知貢舉陳誠之等言考到博學宏詞科
合格人下等左迪功郎監潭州南嶽廟莫冲左迪功郎
臨安府錢塘縣主簿葉謙亨詔並與堂除冲歸安人謙
亨麗水人也

壬子武德大夫和州團練使知閣門事趙述落階官以
述自言元勳普之孫供職殿陛餘三十年且使北來還

以例遷也

閏四月辛未朔左朝散郎孟處義提舉淮南東路常平
茶鹽公事

癸酉上諭大臣曰三衙闕額令諸州揀選補填江上諸
軍令具闕數申樞密院先是禁止諸軍毋得擅自招刺
故上訓及之

甲戌秦檜奏以直顯謨閣知撫州李莊提舉福建市舶
上曰市舶委寄非輕可令莊赴闕稟議然後之任 左

朝散郎王揚英知秦州揚英自尚書郎斥去意望還朝
會秦檜久病乃上書薦熈為相於是檜以郡處之

此以
玉珪

劾揚英章
疏修入

丙子上策試南省舉頭鄭聞已下于射殿制策曰朕惟
祖宗創守之宏規舉可掩迹三五然而中遭厄運變起
弗圖蓋許國之臣無幾而自為謀者總總也今朕承中
興之運任撥亂之責所賴於有官君子為至切矣顧狃
於聞見小慧相先謂了官事為癡謂履忠信為拙以括

囊為深計以首鼠為圓機子大夫讀先聖之書通當世之務其為究復何洒濯可以格舊俗何陶冶可以成美化明著于篇副朕延佇且以觀子大夫入官之志舉人趙達對策畧曰君臣父子之間天下真情之所在陛下以神器之大方與元老大臣協謀比德以緝熙中興之功而百執事之人因循舊習不與聖人同憂蓋自藝祖即位尊禮趙普以為社稷臣重其權信其人雖一時舉職如雷德驤不能間也顯然示天下以好惡之所在磨

以歲月而天下之士洗濯自新風俗一變承平日久士
為曲學阿私之計而風俗壞尚賴祖宗之澤未遠廊廟
大臣有質正不撓者出身捍難作多士之氣以摧折倉
卒之變維持至今此道不墜今陛下已尊任其人矣是
宜明諭天下以好惡所在而又有以振厲之若既知其
為小人確然不惑無使得干廟堂之正議願陛下尊其
所聞每進一人惟其癡惟其拙每退一人惟其深計惟其
圓機則天下之士庶幾稍知向方儻尤不悛陛下赫然

震怒治其尤者一人夫誰敢不服然臣尚有私憂過計者慮陛下尊所聞之不堅異時或有言今之癡者為真癡今之拙者為真拙今之深計者為有德今之圓機者為有謀而陛下疑雖聖主在上賢臣輔相臣不敢謂安靜之福如今日詳定官擬達第五上覽策謂有古文氣乃擢為第一遂賜達等四百人及第出身先是潼州府路提點刑獄公事楊椿被檄考四川類省試策問方今君臣同德之懿因論漢文帝不任賈誼為公卿等事

舉人張震答策言文帝屈已和親而誼欲以表餌繫單于此不適時之論又言主上淵嘿思治上天眷佑為生賢佐一德之誠克享天心椿定為榜首檜大善之及唱名震居第四聞開封人世右職達磐石人震什邡人也已卯宰執進呈進士洪毅上書乞根究轉運司所收諸州補發綱梢糧米及禁止三衙減尅軍錢又言轉運司市馬草支錢不及下戶而有彊取之擾曰可問漕司每年補發米數禁止三衙毋得減尅其馬草令戶部同漕

司措置行下諸路一體行之洪嘗入太學為內舍生乃
詔免文解一次

壬午尚書戶部侍郎兼權知臨安府宋貺罷右正言章
屢論貺市井小人初無才術左藏庫自去年闕乏支遣
不行乃以臨安府公使激賞贍軍三庫那錢物支遣又
不勘虛實令軍人自往漕司支散及令捉事使臣於諸
倡家強買婦人貺章惇甥壻惇以誣罔宣仁之故得旨
子孫不得與行在差遣而貺嘗假章俸錢數萬緡乃辟

其子為酒官又每於省府事輒曰此非貺意嫁怨於上
斂恩於已此最害治之大者望賜竄責以為姦邪之戒
故貺遂罷

甲申左承事郎簽書平江軍節度判官廳公事王佐左
承事郎簽書鎮南軍節度判官廳公事董德元並為祕
書省正字自秦熺後進士第一人甫除官即入館至是
始復舊制焉

乙酉右通直郎李若樸知德安府若樸與何彥猷並為

大理寺丞坐議岳飛獄不合斥去至是十年始守邊郡

彥猷尋通判洪州而卒

彥猷五月丙辰除洪倅未知卒在何年隆興元年正月以右奉

郎特贈
二官

丙戌右朝奉大夫傅寧知沅州還言湖南北之俗遇閏
歲則盜殺小兒以祭淫祠謂之採生望令逐路監司帥
臣嚴責巡尉如一任之內糾察採生七人依獲強盜法
推賞因事發覺則巡尉坐失捕之罪庶幾其弊可革從
之

戊子特奏名進士昌永等五百三十一人武舉進士湯
鸞等六人授官有差永宣城人也

辛卯上謂大臣曰錢塘江石岸毀裂每潮水漂漲民不
安居其令漕司同本府修治如闕役於三衙鎔重內借

差

熊克小歷
誤在五月

癸巳尚書兵部侍郎王會充敷文閣直學士知湖州

甲午太府少卿徐宗說遷太府卿 尚書駕部員外郎

陳相為樞密院檢詳諸房文字

戊戌尚書屯田員外郎張子儀直徽猷閣主管佑神觀

五月庚子朔右宣教郎樞密院編修官兼權實錄院檢

討官周紫芝知興國軍

紫芝不知何時權實討非進士出身人為史官前此未有故出

之

右宣教郎幹辦諸軍糧料院楊迥充樞密院編修

官

乙巳封巫山神女為妙用真人

戊申徽猷閣直學士四川安撫制置使兼知成都府李

玘卒

已酉直祕閣馬純落職依條致仕令汀州居住純自福
建罷歸寓居諸暨縣而右正言章履論純常出怨言輒
議時政每會賓客徃徃多言朝廷政事得失竊恐遠近
傳播有誤耳目望加屏竄庶為姦雄異意之戒故有是
命

辛亥右朝奉大夫知大安軍張輔世代還言四川惟利
州一路創置義士悉於保丁內選克而文其手就令土
豪官領之土豪官率多邀求而又州縣力役歲無虛月

今朝廷清明邊燧不驚望放歸田畝庶幾服田力穡各
安其居詔制置司相度申樞密院時知洋州宋革亦論
義士免家業錢民間物力偏重遂罷之 太學錄兼權
祕書省校勘書籍周麟之改克勅令所刪定官

壬子右朝請郎湯沂知劍州代還論劍州稅草自祖宗
時止輸本州至紹興五年添屯將兵漕司將稅草應副
支遣而於民間重科草佑腳錢望賜除免如川路有米
腳錢處亦乞依此施行事下戶部而戶部言未見當時

如何收納前後亦無許行收納條法指揮欲下總領所
看詳從之

甲寅右朝奉大夫楊朴知榮州還論縣官替罷率於所
部以借夫為名而取其直縣之大者至四千緡其次亦
不下三二千緡州官替罷徃徃亦托縣官為之民間不
勝其苦而無敢訴者蓋起獄追究則所費又數倍於所
出夫馬之直而州縣或據以他事遂致破蕩資產望申
嚴約束仍許越訴詔申嚴行下

戊午金主使翰林學士崇政大夫知制誥兼太子少詹
事劉長言昭毅大將軍殿前右衛充龍翔軍都指揮使
耶律夔來賀天申節 檢校少師奉國軍節度使御前
諸軍都統制知興州吳璘檢校少保武當軍節度使御
前諸軍都統制知興元府楊政定江軍節度使殿前都
虞候鄂州駐劄御前諸軍都統制提領營田田師中並
為太尉璘等建節皆十年御劄以其守邊安靜故有是
命

乙丑秦檜奏欲令國子監復刻五經三傳上曰其他關書亦令次第雕板雖重有所費亦不惜也

六月癸酉上曰近有進易說者以為易非卜筮之書自古以易筮春秋多載其事易有聖人之道四卜筮乃其一豈可以易占為非秦檜曰陛下精於易道非臣等所及 武翼郎閣門宣贊舍人幹辦御輦院劉允升為右武郎幹辦皇城司

甲戌詔淮南諸州將請佃田土年限已滿之人根括包

占頃畝依已降指揮起理二稅用戶部請也先是言者
論淮南田上昨來官司急於人之歸業請佃不究頃畝
多寡止憑所乞遂給與之其間皆是擇膏腴廣包占故
租稅所取無幾近年田野加闢年穀屢登而為農者坐
享厚利乞依舒州已得根括指揮令民戶五家為甲限
一季自陳結無隱匿罪狀官司制籍如出限或所陳不
實致有人告即差官打量出給告人仍追積年租稅入
官本部看詳欲依所乞故有是命

舒州根括指揮據臣
僚劄子稱在紹興十

九年未見
月日當考

丙子秘書省校書郎葛立方為尚書考功員郎孫仲鼇
為司勳員外郎

庚辰左宣議郎知衢州曹筠充集英殿修撰

辛巳詔大理寺三衙及州縣歲支官錢合藥以療病囚
先是大理寺丞謝邦彥面對有請事下戶部本部乞大
理寺京府節鎮並支錢一百緡餘州六十緡三衙各五
十緡大縣三十緡小縣二十緡至是行下

甲申武節大夫滎州刺史閣門宣贊舍人幹辦皇城司
潘邵提點佑神觀

乙酉敕令所刪定官魏師遜面對乞申救郡縣毋得擅
催倚閣積欠詔申嚴行下

丁亥左朝奉大夫楊朴言竊覩紹興十七年聖詔以軍
興以來四川重斂令宣撫總領兩司取索承平時常賦
名色軍興後權所增益叅酌措置自後宣總兩司嘗減
激犒錢及對糴米各五分四川之民蒙被陛下德澤矣

然尚餘糶木水脚錢激賞絹等皆軍興後權所增益者
尚未曾減欲乞詔制置總領兩司更行參酌措置若有
可減即行分數裁減以寬民力戶部言即不見得當時
如何增添前後亦無許行增添條法欲下四川總領所
及逐路漕司看詳措置申省從之

戊子中書門下省檢正諸房公事陳夔言宣州布衣史
敦仁上書陳獻利害尋引問本人書內引援經史多不
知出處顯是假手虛妄詔臨安府差人伴歸本州委知

通究實申尚書省

庚寅右內率府副率愉改賜名愔

甲午上謂大臣曰南班宗室非正任者請給殊薄用度
多不足生日合賜禮物近權住支今當取索放行昨已
嘗賜犀帶及服羅矣大理評事莫濛面對論諸郡重
征商稅又以民間日用之物置場權賣止資公庫無名
妄用其為民害莫甚於此乞令監司檢察按劾從之
秋七月庚子上謂大臣曰漕司米綱多差本司使臣往

往作弊致濕惡腐壞可依祖宗法差在部短使人庶有
顧藉

壬寅集英殿修撰知衢州曹筠為敷文閣待制四川安
撫制置使兼知成都府 太府少卿總領四川財賦軍
馬錢糧汪召嗣直龍圖閣都大主管成都等路茶馬監
牧公事 直秘閣都大主管成都等路茶馬監牧公事
符行中守太府少卿總領四川財賦軍馬錢糧行中嘗
欲增簡州鹽筴以其事屬雅州軍事推官李燾燾力拒

之張浚謂有臺諫風熏丹稜人初第進士調華陽簿未
上讀書龍鶴山之巽巖會詔舉賢良張浚見其所著五
十策善之然不果薦

丁未秦檜奏勿稅商販柴米上曰甚善臨安自減定物
價之後盜賊消矣 詔皇太后視物微昏召行在醫官
并草澤醫治有效者有官人進秩五等賜錢二萬緡白
身人賜錢外比類補官

丁巳宰執進呈諸州招填禁軍闕額數上曰凡闕額須

令補足此祖宗所極留意者也又奏茶鹽法成書上曰
法已定當令久遠遵守往時隨事變更雖可趣辦目前
日後入納稀少非善計也

己未安德軍節度使開府儀同三司權主奉濮安懿王
祠事士隸薨追封通化郡王謚孝敏以其子右奉議郎
不羈為直秘閣

庚申以修天章閣神御殿成詔兩浙轉運司官吏減勘
年有差

壬戌京西路轉運判官李宏罷先是知郢州喬大觀坐
謗訕抵罪而宏不按發之殿中侍御史湯允恭因言宏
行能無取呂本中得罪名教而宏附以為重其識趣可
知大觀妄造語言肆意謗訕宏職當按廉不以上聞失
職已甚乃復交通私書傳意掩覆故有是命 左中奉
大夫淮南路轉運判官沈調充江淮荆浙福建廣南路
都大提點坑冶鑄錢

癸亥吏刑部言應官員曾擅行科率及因害民之事被

罪情理深重者更不注知通知令差遣內有所犯情輕之人具因依申取朝廷指揮始用湯允恭之言也

是月遂寧府言自十七年至二十年嘉禾瑞麥歲產不絕比一百有六

八月

按是月
戊辰朔

庚午大理少卿章燾面對言年穀豐登望

委官就江湖臨流之地置場收糴以備委積詔戶部措置

辛未太師尚書左僕射提舉詳定一司勅令秦檜等上

重修江湖淮浙京西路茶鹽勅令格式二百六十卷上
曰是書纖悉備載若能遵守久遠之利也

壬申揚武翊運功臣太傅鎮南武安寧國軍節度使充
醴泉觀使咸安郡王韓世忠為太師致仕是日世忠薨
于賜第年六十三始世忠得疾上飭太醫馳視問訪之
使相屬于道將吏問疾卧内世忠曰吾以布衣百戰致
位公王賴天之靈得全首領卧家而沒諸君尚哀其死
邪世忠少時為省倉負米之役慄悍絕人不用鞭撻能

騎生馬駒家貧無生業嗜酒豪縱不拘繩檢呼為潑韓
五有日者席某嘗言世忠當作三公世忠怒其侮已痛
毆之年十八始隸軍籍挽強馳射勇冠軍中其制兵器
凡今跳澗以習騎洞貫以習射狡獬之螯連鎖之甲斧
之有掠陣弓之有克敵皆世忠遺法嘗中毒矢洞骨則
以強弩拔之十指僅全四不能動身被金瘡如刻畫晚
以公王奉朝請絕口不言功名自罷政居都城高卧十
年若未嘗有權位者而偏裨部曲往往致身通顯節鉞

相望歲時造門類皆謝遣獨好浮圖法自號清涼居士
于時舉朝憚秦檜權力皆附麗為自全計世忠於班列
一揖之外不復與親逮薨有詔選日臨奠檜遣中書吏
韓瑊以危語脅其家於是其家辭而止賜朝服貂冠水
銀龍腦以斂賻銀帛三千匹兩追封通義郡王其子直
敷文閣彥直直秘閣彥朴彥質彥古皆進職二等孫右
承奉郎挺杖並直秘閣賜五品服又命睿思殿祗候徐

伸護葬事

世忠追封在是月癸酉降旨臨奠在丁丑其
家辭免在庚辰諸子孫進職在二十三年三

月丙申今聯書之二十七年九
月乙巳二子五孫又各進一官

乙亥皇叔岳陽軍節度使知西外宗正事士樽開府儀
同三司充萬壽觀使任便居住 右正奉大夫宋貺令
徽州居住時貺罷居平江而右正言章廈再論貺寄居
輔郡交結妻黨章惇之家意欲動搖國是故有是命

寶文閣學士提舉江州太平興國宮梁揚祖卒贈特進
龍圖閣學士賜其家銀帛三百匹兩

辛巳左朝請大夫兩浙路轉運判官趙士彰直祕閣

壬午太府寺主簿錢端英面對論州縣多移易常平錢
乞戒敕詔申嚴行下端英愕子也

甲申直龍圖閣提點佑神觀秦塤陞祕閣修撰同安郡
夫人秦氏封小國夫人以秦檜進書加恩也塤言見習
舉業所有進職太高實於應舉相妨乞追寢不許 中

書門下省檢正諸房公事陳夔武功大夫惠州刺史權
知閣門事蘇睦充賀金國正旦使副樞密院檢詳諸房
文字陳相武節大夫吉州刺史權知閣門事孟思恭充

賀生辰使副

戊子將作監主簿孫祖壽面對乞開導臨安城中溝渠以泄積水從之祖壽廣陵人也

辛卯詔皇叔昭信軍節度使知大宗正事士權主奉濮安懿王祠事

乙未成忠郎柴大有為右宣義郎監周陵廟以大有自言當世襲也

丙申權尚書禮部侍郎王囂罷以殿中侍御史湯允恭

言其怨望也乃以曦知衢州

九月戊戌朔大理寺主簿丁仲京面對論贍學公田多為形勢之家侵占請佃望提舉官覺察上謂大臣曰緣不度僧常住多有絕產其令戶部併撥以贍學既而本部乞令提舉司置籍拘管其無勅額庵院亦依此施行從之

庚子命日歷所重修宰輔拜罷錄用禮部員外郎林機

請也然亦不克成

市祖見九序
三月丙戌

辛丑大理卿許大英乞申嚴舊制令監司郡守遇有按發官吏並具職位姓名申吏刑部大理寺置籍承勘官司準此庶幾刑部之人不致窘礙從之 是夜雷

癸卯敷文閣直學士知紹興府俞俟引年告老詔遷一官致仕

乙巳左朝散大夫汪待舉知處州還論本州蘇鹽丁鹽之賦輕重不同蘇鹽以田畝計自以舊稅之後厥賦為輕丁鹽以民身計自以舊額折絹之後厥賦為重乞將所

進之丁於第五等以下人戶用其舊額均敷戶部乞如所請自今添丁止均納見認之數不得溢額從之

戊申尚書考功員外郎兼權中書舍人葛立方罷以右正言章廈論其輕恣也

己酉右朝請郎呂稽中知邵州還言近取天下係官之田盡付常平官措置此養民之本然湖南沿邊連接廣西一帶閑田甚多或為兼并之家占據阡陌而其租稅終不入官田野小民未必蒙被恩惠若令輕立租米廣

召百姓耕佃每夫止給五十畝或有輕赦罪人無家可歸亦許依數承佃寬閑之田遂可開闢收其所輸糴其贏餘可以寬州縣之用詔戶部措置

丙辰直祕閣兩浙轉運判官趙士彰知臨安府 直龍圖閣知潭州湯鵬舉知紹興府

丁巳增築景靈宮用韓世忠賜第為之前殿五楹中殿七楹後殿十有七楹齋殿進食殿皆備焉期年而畢

戊午詔文武官緣川陝便宜及雜功遷轉當追減官貲

之人其父母封贈並免釐正以司封員外郎王葆面對
有請也

己未左承事郎周麟之為秘書省正字

庚申右正言章廈試右諫議大夫 左承事郎魏師遜

充樞密院編修官

是月發書樞密院事丞自金國使還

徐夢莘北盟會編云丞自鄭藻

以祈請使副使于金國闕下引見畢內殿奏公事惟正使丞自得入金主問所請者何事丞首言乞修奉陵寢金主令譯者傳言自有看墳人自第二言乞迎請靖康帝歸國又令譯者言不知歸後甚處頓放使第三言本

朝稱皇帝二字又令譯者傳言此是你國中事當自理會彼唯唯而退待辭而歸趙姓之遺史曰巫伋作祈請使而無祈請之辭投書而已議者謂不識字之承苟可優為也

冬十月丁卯朔司勳員外郎權國子司業孫仲鼈面對論近制士人願入上庠州縣次第勘驗於貢舉無違礙及非殿舉屏斥之人給據赴補真良法也今就試之士未必皆由本貫徃徃隨其所寓託稱遊學甚者詭名冒貫設巧求據茲弊不革士將輕桑梓而弗顧棄行檢而弗修欲望且停將來上庠補試畧倣舍法詔天下嚴郡

庠之補月書季考精察其行藝或一歲或間歲遴選一二尤異者陞之上庠充弟子員其道遠貧不能行者官給路費如貢士續食事下禮部看詳後不行

戊辰殿中侍御史湯允恭試司農卿 司農少卿宋仲

堪為尚書左司郎中 詔忠州團練使知金州節制屯

駐御前軍馬李畊令赴行在奏事金州闕令吳璘選差
權官具奏畊守金州凡四年

己巳監察御史林大鼎為殿中侍御史

庚午吏部郎中沈虛中面對論州縣官到選批書間有不圓之患乞以前後條式鏤板領降俾吏無邀索官無留滯從之虛中廣德人也

辛未武功大夫吉州團練使兩浙西路兵馬鈐轄樞密院統領丁禕充江南西路馬步軍副總管禕久幹辦秦檜府故陞差焉

甲戌上幸太傅醴泉觀使清河郡王張俊第壬午制拜俊太師以其姪龍神衛四廂都指揮使清海軍承宣使

添差兩浙西路馬步軍副都總管子蓋為安德軍節度使餘子弟遷官進職者十有三人幹辦府武功大夫高準制轉行右武大夫管轄親兵濠州團練使顧暉除防禦使皆異數也

子蓋建節在十一月癸丑子弟已下遷官在十一月戊申今併書之

是

日秦檜進奏上曰龔鑒守盱眙頗靖檜曰朝廷報對境文字鑿有不放心處必來申明百官有司於所職若皆如此留意則無不濟矣

癸未秦檜奏臨安給丐者錢米自歲十一月為始上曰

此事所濟甚大苦寒之時貧者遂得以活也普安郡王時在藩邸每遇天寒雨雪淹久都下居民有甚貧而無所得食者必命輟俸米以賑之歲以為常

此以張闡所進聖德事蹟

附

承節郎閣門祇候劉伉為武翼郎閣門宣贊舍人伉才人兄也

甲申詔光州已置榷場合行事並依盱眙軍例

已丑責授寧遠軍節度副使袁州安置韋淵復少師昭慶軍節度使萬壽觀使平樂郡王

甲午宰執進呈大理正張巖面對乞禁止州縣差公皂
下鄉州用木匣遞送文書下縣縣令承帖人付之鄉村
上曰朕頃在河朔親見此弊宜申嚴舊法禁止 右朝
請大夫王伯淮知臨江軍代還言清江縣有苗稅錢四
十餘貫苗米四百餘石人煙田產並在筠州高安縣上
項苗稅在經界法謂之寫佃在鄉村謂之包套未經界
之前尚可追理經界既定兩縣各隨產經量承認本鄉
元額稅苗則清江有稅無田高安有田無稅又兩縣一

時結局清江不免以無田之稅增均於元額之田高安
即以無稅之田減均於元額之稅是高安得偏輕之利
清江得偏重之害矣望下本路究實改正詔委本路轉
運判官盧奎先是淳化中建筠州之瀟灘鎮為郡割高
安之兩鄉以隸之繇是有交鄉寫佃之弊伯淮資深子
奎邵武人也

乙未降授郢州防禦使帶御器械潘端卿復閬州觀察
使

是月左中奉大夫王居正卒秦檜之初相也居正時為
修注嘗白上以檜作相前所言皆不讎檜憾之及檜專
國居正畏禍屏居常州時事一不掛口檜猶奪其職奉
祠十餘年至是卒加封吳將甘寧為昭毅武惠遺愛

靈顯王

廟在富池

十有一月戊戌左承議郎主管台州崇道觀程敦厚直
徽猷閣敦厚獻紹興聖德詩極言和議之效又獻秦檜
詩有誕生聖相扶王室之語尚書省勘會敦厚用意可

嘉乃有是命

此以日歷及敦
原文集參脩

戊申樞密院編修官魏師遜諸王宮大小學教授宋樸
並守監察御史

庚戌參知政事余堯弼罷右諫議大夫章廈殿中侍御
史林大鼐共劾堯弼傾邪貪鄙交通三衙結諸州將朝
廷有大議論則閤默無言請貶之以清政府詔堯弼充
資政殿學士提舉江州太平興國宮尋落職 斬有蔭
人惠俊以指斥乘輿法寺鞫實故有是命

壬子詔諸路公私房廊白地錢並減半

乙卯右朝請大夫黃子游知池州還言農田水利所係甚重比緣兵火之後陂塘例皆廢壞官司未遑修治故旱歲則高田無以灌溉霖潦則下田無以泄水殊為可惜望敕諸路提舉官措置修治上謂大臣曰聞陂田多為人侵占可令有司措置毋妨衆用翼日進呈上曰須常平官得人若監司得人事無不濟近時監司多端坐不出提點刑獄職在平反尤當徧臨所部宜戒飭之子

游寔孫也

丁巳進義副尉劉允中棄市以上書希求恩賞指斥乘輿及謗訕朝廷法守鞠實故抵於法

辛酉詔申嚴鞠條令應重罪大情已明其餘輕罪並免追究以大理寺丞郭唐卿面對有請也

壬戌司勳員外郎兼權國子司業孫仲鼇論諸州教官選補不公講說課試多廢乞嚴加督責詔刑部立法

十有二月

脫千支

司封員外郎王葆言民多銷銅錢為器

利率五倍乞禁約詔申嚴行下

壬申夜雷

己卯皇叔潭州觀察使士曠特降一官士曠士樽弟以再娶故宗子安上妻劉氏為大宗正司所劾也

庚辰雪時上以雪未應期遣人禱太一祠雪遂作辛巳秦檜奏事上曰昨晚便得雪甚可喜檜曰陛下至誠昭

格如此當率百官拜表稱賀

熊克小歷稱辛巳雪壬午宰執奏事益各差一日

癸未戶部員外郎李濤面對論近置諸州惠民局慮四

遠藥方差誤望以監本方書印給從之

論官面對正欲開朝廷之利害

天下之休戚今以權姦在位不言當春禁樵捕則言患民局藥方差誤所言僅及此而稍涉時政則噤不敢發言路不通國事從可知矣

丁亥秦檜言臘雪應期中外共慶去年臘中三日雪果大有秋上曰自此二麥可望不惟時豐疫病亦自消矣戊子詔徑山寺僧清言杖脊刺配廣南遠惡州牢城以撰造偈頌鼓惑士衆至有指斥語法當絞特貸之

己丑親衛大夫利州觀察使馬擴卒

庚寅大理寺丞范彥輝面對論州縣獄吏例置私名貼書一切付之鞠獄謂之款司凡老姦停廢與閭閻惡少能弄筆者悉聽為之人之死生悉命於此輩欲望專委監司守臣嚴行覺察湏用試補限以歲年無過犯則如在京補官法詔刑部看詳後不行

卒如大理司直柳大節面對言江浙之間物直貴甚穀賤傷農迹其所以良由征稅之重望詔有司裁定則物價自然低平詔申嚴行下

壬辰清河郡王張俊言葬妻乞下常州差人修整道路
上曰此止可差廂軍不得擾鄉民朕自議和以後人民
安居無復前日饋運之勞故不欲差夫秦檜曰陛下今
日所以當天意正在此也

癸巳金主使驃騎上將軍殿前右副都點檢烏珠魯定
方太中大夫右諫議大夫祕書少監蕭永祺來賀來年
正旦

是歲宗室子賜名授官者十有八人 諸路斷大辟二

十二人 詔臨安府民戶見推排等第依在京例與免

日歷無此今以紹興二十六年十月十八日凌景夏劄子修入未知在何月日也

關外四州

收營田五分租凡二十一萬七千餘石 金主亮下詔

議都燕京詔曰昨因綏撫南服分置行臺時則邊防未寧法令未具本非永計只是從權既而人拘道路之遙事有歲時之滯凡申款而待報乃欲速而愈遲今既庶政惟和四方無侮用併尚書之亞省會歸機政於朝廷又以京師粵在一隅而方疆廣於萬里以北則民清而

事簡以南則地遠而事繁深慮州府申陳或至半年而
往復間閻疾苦何由期月而周知供饋困於轉輸使命
苦於驛頓未可時巡於四表莫如經營於兩都眷惟金
燕實為要會將因宮廟而創官府之署廣阡陌以展西
南之城勿憚暫時之艱以就得中之制所貴兩京一體
保宗社於萬年四海一家安黎元於九府咨爾中外體
予至懷將軍等每名各支喝賞銀絹九匹兩詔後宰執列
銜者九人其稱皇弟太尉領三省事樞密使秦國王則

亮之弟亢起復特進參知政事滕國公則蕭裕也

此以兩國

編年修入金中有板行翰林直學士趙可文集載其所撰都人進義何公墓碣云天德三年展都城或薦公於用事者於是東阡西陌線引碁布其制蓋皆出於公焉天德三年則今年也

建炎以來繫年要錄卷一百六十二

建炎以來繫年要錄卷一百六十二金人地名考證

烏珠

原書作兀朮
誤改見卷一

欽定四庫全書

四

大
小
卷一百六十二

欽定四庫全書

建炎以來繫年要錄卷一百六十三

宋 李心傳 撰

紹興二十有二年

歲次壬申金海陵
煬王亮天德四年

春正月

按是月巳
丁酉朔

亥雷

丁未少師昭慶軍節度使萬壽觀使平樂郡王韋淵為
太保 右通直郎直秘閣高百之提舉兩浙東路常平
茶鹽公事 右中大夫范直方卒

已酉忠翊郎閣門祇候趙廓為武翼郎閣門宣贊舍人廓密子也

丁巳大理評事莫濛面對言州縣常賦秋苗官耗義倉各有定數而別立名色於民戶至有納一二倍纔及正額者止資官吏侵欺盜隱無補用度乞令有司檢坐條法揭示許民越訴從之

庚申右文殿修撰知婺州趙不羣為兩浙路轉運副使二月丙寅朔資政殿學士知宣州楊愿知建康府宜

州觀察使御前左部統制軍馬知階州姚仲改知金州
兼金房開達州安撫使節制屯駐御前軍馬從吳璘奏
辟也

庚午詔南班宗室應權住支請及郊禮支賜等並依舊
格放行時近屬有身沒而無以歛者安慶軍承宣使同
知大宗正事士街言於朝故有是命

辛未大理評事俞長吉面對論州縣於民輸常賦有追
鈔銷簿之弊甚者匿其戶鈔抑令重納望申嚴法禁仍

令通判專一檢察詔戶部申嚴行下

壬申大理評事王洪面對言申令所載三年一造簿書於農隙之時令人戶自相推排蓋欲別貧富從均平也比年縣令貪墨者輒促限以開賄賂之門庸懦者則遷延以俟後政姦弊不可勝言望戒飭有司不得妄有展促從之

癸酉左朝散郎都紘知南安軍代還言差役之法別縣有物力稅錢各從等第差選今乃有兩處同時執役者

所費甚大恐非立法本意望明降指揮兩處應役者一處役畢他處乃差惟不許罷役而歇以別於一處當役之民庶幾輕重適中權歸三尺詔戶部看詳申省

丙子右中奉大夫直祕閣王晌知宣州

丁丑上謂大臣曰近有士人投獻詩賦之類其間文理可採者可取旨與免文解

庚辰軍器監丞黃然面對論沿江一帶稅務比來非理邀取商旅患之於是號斬之斬陽江之湖口池之鴈汊

為大小法場咸謂利歸公家無幾而為吏竊取大半矣
望令所隸州縣選官檢察收放漕臣考察從之然庭堅
孫也

壬午詔建祚德廟於臨安府用殿中侍御史林大鷗請
也先是毀其廟以為大理寺而大鷗言三人者有大功
德於聖朝今神靈不妥士庶悲嗟宜進爵加獎尋進封
程嬰為疆濟公公孫杵臼為英略公韓厥為啓佑公陞
為中祀

三神進封在
七月甲午

壬辰宰執奏殿前司揀退軍兵上曰數內放自使人可
諭楊存中須令有所歸毋致失所

癸巳左朝請郎魏安行知滁州代還言國家取民有制
陛下軫念兩淮歲歲展免每田一畝止收粟子五升然
州縣不能盡承德意取于民者正數之外每斛加至六
七斗多者徃徃倍之頃歲廣德軍受納嘗用平斛令人
戶自概滁州亦用平斛民間樂耕見今州倉已有三年
之儲民間每歲增收不止三十萬斛公私皆利儻聖慈

以前件平斛或可行用乞先自兩淮始詔戶部措置先是滁州三縣合水陸之田以頃計之三萬九千有奇自紹興十九年前開耕纔千九百頃安行招集開墾所增遂倍乃擢安行為京西路轉運判官

安行除漕在三月壬寅

三月

按是月丙申朔

丁酉右承務郎王之奇之荀並特除名

日

不載王之奇之荀所歷官今據家傳增入

之奇送梅州之荀追所有官送容

州並編管二人皆庶之子以其父責降身死撰造語言

謗毀朝廷法寺鞫實故有是命

臣嘗聞長老言有告秦檜以之奇欲結客刺檜

者由是
得罪
上因言庶為人凶悖深沮休兵之議幾誤國事

壬寅直龍圖閣提舉台州崇道觀葉三省落職筠州居
住承節郎監臨安府都作院王遠除名高州編管先是
三省嘗與趙鼎王庶通書力詆休兵之議明州進士陳
燾得其真蹟并遠遺三省猶子書併上之詔送大理至
是法寺言三省等撰造語言謗訕朝廷秦檜進呈上曰
此不可不懲庶後來者知畏乃有是命

癸卯龍圖閣學士降授左朝請大夫提舉江州太平興

國宮程瑀卒

已酉殿中侍御史林大禹言比糶馬穀以香引錢為糶本既為有司互用民亦不敢歛望第輸納溢所拋之數太多如江陰小壘視苗拋降苗不及七萬石漕司拋下馬料才三萬三千石計今所輸之數不啻十萬石如湖州產茶諸縣各有園戶祖宗朝並無茶稅州縣舊來立歲額每畝輸三斤已自非法比年官司又於額外抑配園戶茶引僧人茶鈔武康一縣園戶買茶引每畝出鈔

三伯文足僧人買茶鈔每名出錢三貫六伯文足而元額自若也江陰武康皆王畿之內所聞如此則嶺海之外弊將若何一有訴於縣縣利其經費而不顧訴於州州受縣之贏餘而不問至訴之監司省部又為州縣沈擱不行萬一窮治其事不過以為事循前例當時初例作俑者官已離任吏以徙死罪責不我及焉故州縣得以安而行之欲望降詔申勅自約束後將初意循例者究治同坐庶幾美意實惠同決于民上曰此須是守令

得人秦檜曰陛下今日中興內外無事所乏者循吏爾
上曰然守令非人不可不治若置而不問則全無忌憚
矣上又曰錢穀大計亦要戶部得人朕觀徽宗朝戶部
之職多自發運轉運使推用蓋以經歷民事諳練財賦
故也大禹所奏其令戶部行下據實數收糶馬料不得
踰額賣茶不得抑配餘從之 徽猷閣待制提舉台州
崇道觀董弁落職弁寓居宜興而右諫議大夫章厦論
寄居干撓縣道弁為尤甚良民被害不可勝言故有是

命

庚戌徽猷閣直學士致仕向子諲卒於臨江軍子諲既告老歸玉筍之舊隱號曰薌林凡十五年而卒

辛亥上謂大臣曰近諸軍多有揀退人數可取索招填今日雖息兵無事然武備不可去也 敕文閣直學士

提舉江州太平興國宮林待聘卒

壬子右正奉大夫宋貺提舉江州太平興國宮依舊徽州居住從所請也

癸丑司農卿湯允恭面對言豐年屢應米價至賤下等
人戶無他商販以錢輸官遂成逋欠欲望降旨應民間
下戶畸零夏稅及丁錢之類除依條赦倚閣外願輸米
者官定時價而折納之如係上供之數乞令常平司以
錢兌糶後來隨時出糶公私兩利詔戶部看詳

丙辰直龍圖閣知紹興府湯鵬舉罷以右諫議大夫章
厦論鵬舉以宅庫欠賣酒錢而妄劾副將劉之儀致其
死也

丁巳詔新除司農寺丞鍾世明往福建路措置寺觀常住絕產時住鷺度僧道牒已久其徒寔少而福建官自運鹽其直頗貴於是民多私販議者以為客販可行遂命世明往本路措置凡僧道之見存者計口給食餘則為寬剩之數籍歸於官其後世明言自租賦及常住歲

用外歲得羨錢二十四萬緡詔赴左藏庫

熊克小歷云明年慶遠軍

節度使張澄帥福州復請于朝率還六七按會要世明元措置剩錢三十六萬五千八百餘緡已而澄乞添給童行人力米外實餘三十萬九千餘緡克誤也

戊午資政殿學士提舉江州太平興國宮何鑄薨後謚
恭敬

己未祕書省校書郎董德元面對論高禛名為大祀而
禛神乃位於壇下酌用一獻恐非所宜望與青帝分為
二壇庶可求昭格詔禮部看詳

庚申徽猷閣待制提舉江州太平興國宮鄭朴卒

辛酉詔四川監司州軍今後募差管押綱運先選有行
止可以倚仗官及召有行止付身圓備之人充保如押

人侵使移易其保官與降兩官元募差不當官吏降一
官放罷所少錢物押人依法斷罪仍估賣家資填納如
有未足數目於干繫人名下追理從戶部請也

癸亥宰執進呈大理寺主簿丁仲京面對劄子論遠方
州縣預借人戶稅租有借及一二年者其間復以本色
紐折見錢價又倍之輸納稍緩加以嚴刑上曰此多是
州郡妄用若搏節不至如此可申嚴行下如違令監司
按劾御史臺彈奏

夏四月

按是月
丙寅朔

丁卯殿中侍御史林大鼐論上饒知縣

吳芑阿徇余堯弼疆市民田時堯弼以左中大夫家居
戊辰奏檜進呈上曰聞其人訴之臺部可罷芑令本路
監司根治上因言縣令不法無由盡知已諭言官以所
開彈劾矣

己巳司農寺主簿盛師文面對論頃嘗指揮州縣貧乏
之家生男女不能贍養者每人支錢四千後改支義倉
米一石然近於臨安市井窮民未聞有得斗米千錢者

况於鄉村與夫窮僻鎮聚望申嚴舊令咸以舉行從之
癸酉右諫議大夫章厦試御史中丞殿中侍御史林大
萬試右諫議大夫

丙子端明殿學士簽書樞密院事巫伋罷伋與秦檜居
同鄉一日檜在都堂偶問伋云里中有何新事伋不敢
對徐云近有一術士自鄉里來頗能論命檜變色謂伋
曰是人言公何日拜相伋皇恐而罷章厦聞之即劾伋
陰懷異意以搖國是林大萬亦奏伋黷貨營私於是並

遷二人而後以本職提舉江州太平興國宮章再上遂

落職辛巳拜夏端明殿學士簽書樞密院事

中興聖政呂中講義

曰巫役術士之對蓋恐輒及時事以觸檜之怒故舉泛言不切之事聊以塞責云爾而檜勃然變色遽啖使言路逐之惟恐他人攘已之位雖檜之猜狠忌刻不近人情然亦可以為依阿取容諂事權貴者之戒矣

壬午詔權知閣門事孟思恭可與外任

乙酉詔宗子趙不辱令大宗正司庭訓鎖閉不辱寓居

秀州與母妻夜游於市有右廸功郎呂禘者被酒衝行不辱怒毆之致死法當絞特貸之

丙戌孟饗景靈宮令宰執分詣時新宮未成祖宗神御
皆寓於西齋殿故也

戊子監察御史宋樸守殿中侍御史

辛卯國子監主簿史才面對乞申嚴百官造謁之禁從
之

壬辰秦檜奏廬州觀察使王俊往在岳飛軍中彈壓有
勞以為浙東馬步軍副都總管上曰飛當時欲具舟船
入川有統制官說諭諸軍乃止 右諫議大夫林大禹

言比者朝廷以福建寺觀絕產上供鈔鹽委司農寺丞鍾世明措置而遠方盛傳以為計口籍丁而沙汰之又謂更變鹽法以杜絕私販別致生事欲望降詔諭以至意詔言者論列福建住持請託之弊官鹽科賣之擾令世明以使指行下州縣照會

五月

按是月乙未朔

丙申上謂宰執曰昨治王繼先賣布事極

係利害恐諸將因而交結就尅軍人食錢償之可諭與成閔今後有似此事並申樞密院

庚子詔故延福宮使保康軍承宣使黃冕將合得遺表
恩澤特贈保寧軍節度使賜諡僖靖

辛丑右諫議大夫林大鼎言比來遐方多有健訟之人
欺給良民舞玩文法州縣漕憲未結絕則申寃于部于
臺于省官司眩於偏詞必與之移送重定外方徃徃觀
望為之變易曲直欲今後所訟如婚田差役之類曾經
結絕官司須具情與法叙述定奪因依謂之斷由人給
一本厥有翻異仰繳所結斷由於狀首不然不受理使

官司得以參照批判不失輕重而小人之情狀不可掩矣將來事符前斷即痛與懲治可使戶婚訟簡臺省事稀亦無訟之一策也上曰自來應人戶陳訴自縣結絕不當然後經州經監司以至經臺然後到省今三吳人多是徑至省如此則朝廷事多可從所奏

癸卯左朝請大夫陳湯求知池州還論郡縣以耕牛水車舟船農具估為家力視此等降差役科敷其交易買賣又重收稅錢非勸農之本意乞委常平司糾察詔申

嚴行下

丁未司農卿湯允恭罷以殿中侍御史宋樸論其褊急任私也

庚戌封婕妤劉氏為婉容新興郡夫人吳氏宜春郡夫人劉氏並為才人宮中號婉容為大劉娘子才人為小劉娘子

癸丑金主使宣奉大夫刑部尚書行大理卿田秀穎安遠大將軍克客省使兼四方館副使大允來賀天申節

是月襄陽大水平地丈五尺漢水冒城而入右朝奉大夫知府事榮蕤乘桴得免於是與轉運判官魏安行議講復環城古堤以捍水許之明年冬按四縣之籍計田出力百畝一夫得三千餘人減其田租十之二凡五旬

有七日而畢計用工十五萬有奇其長四十餘里

此據王之

望記請復堤在十一月今併書

容州奏野蠶成繭

右朝請郎主管

台州崇道觀曾恬卒 潼川府言涪城縣進士馬天祐

廬墓孝行顯著詔賜粟帛

六月

按是月
甲子朔

戊辰右通直郎劉炎請換右職詔以為閣

門宣贊舍人

炎初見十
年正月

尚書左司郎中宋仲堪罷以

殿中侍御史宋樸言其劾鄭剛中獄事淹延且交結巫
伋也 武翼郎閣門宣贊舍人劉伉為右武郎幹辦皇
城司以才人進封故遷之

壬申樞密院檢詳諸房文字陳相試尚書左司員外郎
丁丑宰執進呈右朝請大夫知嘉州王知遠到任五事
論四川鐵錢至少自罷鑄後見今嘉邛州及成都府各

初都作院以嘉邛所產鐵炭打造軍器赴利州椿管數
目不少今邊事寧息望將兩州依舊鼓鑄小鐵錢上曰
知遠所論於錢引實有利害可委總領所同本路漕臣
措置後未及行知遠白石人也

紹興三十一年
邛州復鑄錢

辛巳上諭大臣曰聞淮東被水民多轉往淮西可令漕

司賑濟

壬午中書門下省檢正諸房公事兼崇政殿說書陳夔
試太常少卿時夔送伴北使甫還未及國門以憂去

乙酉奉安祖宗帝后神御于景靈宮太師尚書左僕射
秦檜為禮儀使

丁亥右文殿修撰兩浙轉運副使趙不羣卒

戊子上謂大臣曰檢鼓兩院近日絕少論利害文字恐
有阻遏可下所屬檢察大理少卿章燾面對乞申嚴
暑月浣濯獄具之令從之

壬辰起居舍人權直學士院湯思退權尚書禮部侍郎
尚書禮部員外郎林機試起居舍人

是月尚書禮部侍郎兼侍講陳誠之以母憂去先是秦檜嘗諭誠之曰事有所聞可以片紙見喻蓋檜方用告訐以擢人才誠之不領其意以此頗忤檜左朝散郎張九成時謫居南安軍或問九成曰近日士大夫氣殊不振曾無一言及天下事者豈皆無人材耶九成曰大抵人材在上之人作成若推抑之則此氣亦索有道之士不任其事安肯自辱哉秦公方斥異已大起告訐此其勢欲殺賢者然未必不反激人之言子姑俟之

敷文

閣直學士知瀘州馮楫卒楫素佞佛晚歲尤甚以傅會和議故為秦檜所厚帥本路者凡八年

秋七月

按是月
癸巳朔

乙未右承議郎知秀州鄆城直祕閣

丁酉左朝奉郎提舉江州太平興國宮劉一止復祕閣修撰致仕一止以疾篤告老故有是命

壬寅右諫議大夫林大鼎言臣伏讀天聖詔書令流內銓裁內外歲舉員數文臣待制至侍御史武臣觀察使至諸司使舉吏各有等數毋得輒過而被舉者須有本

部長吏乃得磨勘詳此即知天聖以前朝廷常參官皆得舉人不限內外亦無員數其時磨勘京官用考第少而舉員亦不多言者憂其名器冗濫至是頗有裁減皇祐中旋增四考為六考增二員為五員非本部長貳吏毋得輒舉立為永式迺今日見行條法也然古今異時法無一槩仁祖朝科目人少磨勘者稀行之數十年人無淹滯法亦流通也自熙豐宣政間已有論列其不便者矣中興之初恩或非泛人得僥倖有以從軍而改秩

者有以捕盜而改秩者有以登對而改秩者今則朝廷
清明無事慎惜名器改秩無他只有薦舉一路而貪躁
者速化廉靜者陸沉法誠祖宗之法不知入流寔廣數
倍如祖宗之時也臣欲取考第員數增減以使之增一
任者減一員九考者用四十二考者用三十五考者用
二若二員則保舉之古法不可減也如減舉法行中須
實歷縣令不得仍請嶽祠其或負犯殿選自如常坐士
有應此格者行無玷缺年亦蹉跎無非孤寒老練安義

分之人收獎老成不爲濫恩如臣管見足采欲望付有
司看詳而條上之以取聖斷庶幾中外弭奔競之風士
夫絕滯淹之歎詔吏部看詳申省

甲辰將作監主簿孫祖壽面對言祖宗薦舉格法尤重
親民之官近歲格應薦舉者既未必能一一知人而生
弊日滋遂有踰越舉員之數重發奏牘以掠虛惠其被
舉者往往爭先到部密賂胥吏故散舉主以絕後至甚
至於昧其所知公納厚賄使守節寒士甘心遐遺其違

聖化敗士風也明矣欲望申飭有司增重法令有犯必
行詔刑部申嚴行下其受賄一節立法申尚書省其後
本部請以受所監臨財物論著為令從之

十一月丁巳立法

乙巳上曰聞四川所起禁衛軍所費多出於軍衆可劄
下總領司應副都官員外郎劉澈面對乞戒監司郡守
以時檢舉奉行寬恤詔書從之 武翼大夫貴州刺史

兼閣門宣贊舍人韋誼落階官提舉佑神觀修武郎韋
訢為武翼大夫高州刺史提點佑神觀訢淵子也

丙午祠部員外郎李巖老面對論士大夫奔競望令有司復舉謁禁之條而必行之詔申嚴行下

丁未詔在部注授知州銓量過期六十日不到許以次人攙注聽其別射家便差遣以吏部郎中沈虛中面對有請也先是有詔銓量因民事被罪及癯老疾病之人而授闕者或遷延不赴故虛中以為言

辛亥左朝散大夫知眉州邵博罷先是直徽猷閣程敦厚廢還里居專以持郡縣短長通賅謝為業及博為守

貌禮之而凡以事來輒不答敦厚銜之會直徽猷閣成
都府路轉運副使吳垌從襄陽來多以襄人自隨分屬
郡取俸博獨不予敦厚知垌怒乃為匿名書訐博過惡
及其帷箔等數十事遣人持寘成都客舍垌得之大喜
劾于朝詔罷博令成都府究其事前是垌已捕博送成
都府司理獄司理參軍韓抃懦不及事垌擇刻深吏簽
書判官廳公事楊筠主鞫之眉州兵馬都監鄧安民以
勤力為博所知主帑庾之出入首捕寘獄中數日掠死

博懼每問即承提點刑獄公事周綰知其寃亟詣獄踈
決博乃得出閱實其事但得以酒餽游客及用官紙劄

過數等事獄上博坐降三官

敦厚事並以洪
邁夷堅志修入

甲寅殿中侍御史宋樸言今日郡縣有便文之弊自省
部以至監司郡縣更相逭責初無體國之實縣則衆責
所歸文移尤峻且數號為紙鷄為縣之人自非特立獨
行者則便文以罔民此弊不革實害治之大者望陛下
與大臣講求所以革之之術申嚴行下從之

乙卯詔仲冬薦獻永佑陵等攢宮及檢察禁地就差大
宗正丞馮至游故事太常少卿以春秋二仲行園陵至
是太常官全闕但以祕書省著作佐郎丁晏明兼權晏
明請於朝至游供職紹興就遣之也

丁巳右諫議大夫林大鼐言武臣奏薦多出軍中軍中
爵秩高而少族姓凡有奏薦同姓皆期功異姓皆中表
市井暴富者咸附會以進塞帥柵長利其高貲犬牙相
錯蒙蔽有司欲乞係軍中奏薦須經統轄長官結罪保

明庶少斂戢詔吏部措置 是日虔州軍亂初江西多盜而虔州尤甚故命殿前司統制吳進以所部戍之虔之禁卒嘗捕寇有勞江西安撫司統領馬晟將之與進軍素不相下會步軍司遣將揀州之禁軍而衆不欲行有齊徒者以賂結所司選其徒之強壯者以捕盜為名分往諸縣夜兩軍交鬪州兵因攻城作亂殺進晟遂焚居民逐官吏守臣左朝議大夫余應求之父安行年八十餘矣避亂墜塹死應求遂以丁憂為辭而去於是叛

軍據城自守安行少篤學年二十餘舉進士甲科遂掛
冠去學者號為石月先生

庚申宣州觀察使主管侍衛馬軍司公事成閔特轉行
一官以景靈宮成閔與督役故也修內司兩浙轉運司
官吏第賞有差 敷文閣待制知潭州沈昭遠卒

辛酉司勳員外郎兼權國子司業孫仲鼇言今日習禮
之士比之他經十無一二以前舉言之天下薦名於禮
部者凡二千七百五十餘人而習禮記止四十人習周

禮止五十人可謂鮮矣竊恐禮學寢以無傳此亦扶持斯文者所當深慮也望令州郡有能明習二禮者優加延請使主講說以為學校勸率及令將來科舉考校並省試官究心誘進毋以所習者少或遂廢之則經學幸甚詔禮部措置

壬戌秘閣修撰提點佑神觀秦墳為右文殿修撰直龍圖閣提點佑神觀秦堪為秘閣修撰以檜辭免奉安神御加恩也

八月

按是月
癸亥朔

乙丑右朝請郎添差通判平江府張子華

提舉福建路市舶子華叔獻子也

右迪功郎吳曾充

勅令所刪定官

丙寅宰執進呈比部員外郎李泳面對劄子論淮西田疇高原去處舊有陂塘以資灌溉今墾闢雖廣而未究水利若使民戶自行開濬竊恐方集之人有傷其力量詔有司俾於農隙官給錢米以濬治之上曰聞諸郡陂湖蓄水去處如紹興及淮南往往為民侵占雖目前州

郡獲利恐二三年後無水溉田即為害不細矣泳所奏
可下本路常平司措置

丁卯大理正孫敏修面對論州縣推鞠強盜間有捕盜
官希賞求囑獄吏非理鍛鍊平人致誣服其罪望申嚴
法禁令監司常切覺察從之

辛未詔文武官應得酬賞及選人依法改官令吏部先
次開具格法申取朝廷指揮

紹興二十六年正月已巳
不行日歷不載此事今追

書
之

壬申泉州觀察使提舉台州崇道觀潘長卿利州觀察
使提舉台州崇道觀潘粹卿閬州觀察使帶御器械潘
端卿並為承宣使長卿寧江軍粹卿建寧軍端卿昭信
軍武翼大夫高州刺史潘清卿落階官為榮州刺史武
翼大夫賀州刺史潘墨卿武翼大夫吉州刺史潘才卿
並轉一官陞團練使墨卿成州才卿忠州自長卿以下
皆吳國長公主之子特推恩也

甲戌右諫議大夫林大鵬兼侍講殿中侍御史宋樸兼

崇政殿說書

乙亥監察御史魏師遜面對論州縣二稅攬納邀阻之
弊詔申嚴行下

己卯江西安撫使張澄言虔州兵亂詔鄂州諸軍統制
田師中速遣兵仍合澄集本路兵擒捕後二日又遣殿

前司遊奕軍統制李耕將所部千六百人往討之

熊克
小歷

八月殿帥楊存中奏據本司統制官吳進申虔州將兵
反按日歷稱齊述者因步軍司差官揀兵因糾合攻打
州城逼殺本州駐劄殿前司統制官吳進并安撫司統
領官馬晟遂據城縱火不知何以却是吳進申到也當

求它書
參考

大理正張曦面對論寄居士大夫與大姓豪
家騷擾村民小不如意即送都保鑱縛捶楚乞委守令
禁止詔申嚴行下

辛巳利州觀察使御前前部統制王彥知階州依舊節
制綿劍州屯駐軍馬以都統制吳璘薦舉從四川安撫
制置司保明也

丙戌尚書司封員外郎兼權國子司業孫仲鼇為大金
賀正旦使閣門宣贊舍人陳靖副之吏部員外郎李琳

為賀生辰使忠州防禦使帶御器械石靖副之靖開封人也

丁亥右武大夫忠州團練使提舉台州崇道觀趙子彥卒於是恩平郡王璩以憂去官

戊子上謂大臣曰比累禁私商泛海聞泉州界尚多有之宜令沿海守臣常切禁止毋致生事大理寺丞郭唐卿面對論遠方州縣獄具多不如式望申嚴法禁從之

庚寅敷文閣待制知潼川府沈該移知夔州該初為秦檜薦引及登侍從上頗知之檜忌之故出於外

九月壬辰朔哲宗賢妃慕容氏薨

癸巳大理寺丞黃子淳面對乞申嚴民間生子不舉之禁從之

乙未詔殿前司左翼軍統制陳敏以所部討虔州叛兵先是叛兵突出徑走南康軍而寓居左朝奉郎田如鼇為其所得遂復還據虔城時李耕纔至江東而敏駐溫

陵被本路安撫司檄以所部千五百人護閩境於是領
殿前都指揮使楊存中言敏本虔人且嘗於江西捕寇
有功望令進兵與耕併力討賊乃以如鼇權江西提點
刑獄公事令即城中撫定之

丁卯左朝奉郎周楸言前任知蘄州從士民之請修復
河堤以捍水勢工費已具望委州縣就農隙興役上可
其請因謂大臣曰不獨蘄州凡沿淮有當備水患去處
悉令漕臣同守臣措置

戊戌都官員外郎劉澈言法有按問欲舉自首之條所以示民自新之路而斷獄者易以得其情也然所至姦吏於麗罪者或告以按問之法而取其貨賂或略其減等之因而置之重辟犯罪雖同斷獄乃異望特降旨應麗罪者先以長吏親問責其情實而後送獄庶幾愚民不為姦吏所陷詔刑部措置申省

癸卯右諫議大夫林大禹言兵弛久佚主將輒移其力而他役之今有伐山為薪炭聚木為簿筏行商坐賈開

酒坊解質庫名為贍軍回易而實役人以自利甚者至有差借白直為廝隸之賤供土木之工不知其數望詔中外將帥遵守祖宗條法仍取約束未盡者增廣而峻行之詔刑部檢坐見行條法行下諸軍遵守內借人一節借者與借之者並同罪

甲辰太府寺丞徐璉面對乞嚴責諸縣於公差常賦之外毋得侵擾保正詔申嚴行下

丙午升廣州香山鎮為縣從本路諸司請也

戊申升桂陽監為軍

已酉殿中侍御史兼崇政殿說書宋樸為侍御史樸甫受命即劾端明殿學士簽書樞密院事章履多納賄賂引致市井小人以為肘腋平居備位充數未見有害一旦臨大利害內懷奸邪外肆譖險必致敗事而後已右諫議大夫林大萬亦論履斗筭小器一旦致身宥密之地議論喧然皆曰章新婦也作兩府言履為人踧踏無儀矩也况又背公營私附下罔上朝廷機密無不漏泄

望亟加黜責以為貪懦素餐之戒

癸丑章履以本職提舉江州太平興國宮章再上遂奪
職履入樞府才九十三日

甲寅秦檜進呈左右司狀伏覩章疏其間大理少卿章
燾勅令所刪定官吳悌並為章履心腹之交以刺報事
端竊慮逐人難以依舊存留在任欲乞並與外任宮廟

差遣從之

以左右司按朝士前所未有是時陳相為左
司員外郎右司闕人不知權官為誰當考相

此月己未除
權吏部侍郎

乙卯祕閣修撰致仕劉一止上中興聖德詩擢一止敷
文閣待制

戊午國子監主簿史才充御史臺檢法官用侍御史宋
樸請也

己未右諫議大夫林大鼐試吏部尚書仍兼侍講尚
書左司員外郎陳相權吏部侍郎

庚申尚書比部員外郎李泳守左司員外郎

冬十月壬戌朔侍御史兼崇政殿說書宋樸試御史中

丞 御史臺檢法官史才為右正言 監察御史魏師

遜守殿中侍御史

初殿前司遊奕軍統制李耕左翼軍統制陳敏副將周成鄂州副統制張訓通池州統領崔定殿前司摧鋒軍統制兼知循州張寧皆以兵至虔州城下而敏所部統領官元玘戰死既而權江西提點刑獄公事田如鼇在城中與賊黨齊述謀誅首亂者蕭顥等四十餘人即以撫定聞於朝耕往受其降述等列拜城上而終不肯出

有詔如鼇果是撫定令素隊赴軍前與免究詔耕諭述
等速出降即不進兵述欲聽命為其子所制但列衆於
城上聲喏而拜終不肯出是日壬戌如鼇自出城與耕
相見耕遂留之有父老數十人詣耕乞令如鼇復入耕
叱之去因密言賊已穴地道欲出犯官軍宜防之耕即
以其兵二百人送如鼇還南康軍甲子召如鼇及左朝
請郎施鉅並赴行在

丙寅御史中丞宋樸兼侍講

熊克小歷於癸酉始
書樸除中丞蓋誤

壬申左宣教郎杜師旦添差通判處州

日歷紹興二十年丙子凌哲

秦杜師旦知天台縣賊行僭侈守臣蕭振對移臨海縣丞師旦怨振遂撰繆政錄納于故相曹泳劾之振以是得罪師旦通判處州又除浙西提舉以事考之哲所言當不妄振落職池州居住在此後八日

癸酉左朝請郎京西路轉運判官兼提刑提舉常平茶鹽等公事魏安行特轉一官以前知滁州開墾荒田二千餘頃推恩也

甲戌御史中丞兼侍講宋樸克端明殿學士簽書樞密院事樸自撫州學官召還甫踰年而執政直祕閣新

知虔州逢汝霖改差主管台州崇道觀以本州軍賊竊發避事不即之任故有是命 忠州團練使殿前司遊奕軍統制李耕為龍神衛四廂都指揮使知虔州

已卯直祕閣知臨安府趙士彰言本府地分濶遠欲更增置三十五鋪共作一百五十鋪巡警盜賊所有合添兵級乞於行在殿前馬步三司軍兵內與本府相兼差撥從之

庚辰詔責授建寧軍節度副使昌化軍安置李光侂已

降指揮永不檢舉徽猷閣待制知台州蕭振落職池州
居住從政郎楊煒特貸命追毀出身以來文字除名勒
停永不收叙送萬安軍編管初光既參大政煒以朝廷
和議為非作書欲獻光先見振言其意光不答及是振
知台州煒為黃巖令政頗有聲振每聞煒大言無顧畏
則擊節稱善遂薦煒改秩又移書浙東提點刑獄公事
秦昌時俾同薦之昌時檜猶子也因囑吏密語振曰煒
嘗以書責光及太師昌時其姪義不當舉如待制亦不

可舉也振曰吾業已許之豈可中輟煒在官鉏治凶惡無所貸俄縣吏得煒書有詆檜語昌時聞於朝詔送大理寺仍下所司發卒大索煒家得所草萬言書語益切

煒上光書已見煒具伏紹興八年在臨安府聞朝廷講

和鄰國煒以為非是欲撰造語言作書上光言更改講和之意以規進用時振任侍御史煒因見振先說書意振答云亦恐敵人難信公書意甚好遂作書上光光覽書遣人傳語煒諭以不及答之意刑寺奏煒當死上特

宥之其兄左從政郎炬亦連坐除名煒徒步赴貶所至撫州病士人鄒陶見之昇致其家出白金以贖乃得去煒植子陶餘子也

餘宜廣人故殿中侍御史孫覲撰煒墓誌載此事於十九年蓋誤炬二十

四年二月編管

入內東頭供奉官幹辦內東門司王晉錫還

所寄資為正侍大夫宗慶軍承宣使帶御器械

辛巳左承議郎諸王宮大小學教授陸升之知大宗正丞秦檜以其訐李光故用之詔廣州見任官將錢物寄附綱首客旅過蕃收買物色依勅徒二年斷罪

此以紹興二十

年十月五日
戶部狀修入

壬午左朝散大夫知盱眙軍龔鑒直祕閣再任

丁亥右通直郎添差通判嚴州鄭珙直祕閣閤門宣贊
舍人潘堯夫為右武郎堯夫正夫弟珙穀子也娶吳國
長公主之女主為請而命之 右承直郎新監太平惠

民北局張昉令吏部日下添差遠小監當差遣以右正
言史才論其專事口吻撰造不根恣為毀譽動搖人情
故也

是月李耕始受知虔州之命耕既往攻城猶冀就招安
賊曰健兒輩初只緣與吳統制下人爭今作過已至此
縱招安朝廷亦不赦也時城中細民皆絕食每日為賊
役者才得一二升間有出投官軍又為賊所殺上謂宰
執曰前日差耕知虔州甚當使百姓知已有知州心有
所歸也上語在甲申
今聯書之

十有一月辛卯朔左朝請郎施鉅為監察御史 左朝
奉郎田如鼇為廣南西路提點刑獄兼提舉常平同提

舉本路監事

辛丑左朝奉郎知常州錢周材獻紹興聖德詩詔周材
克集英殿修撰

癸卯左朝奉郎凌景夏知筠州景夏在館中與秦檜異
論閑居几十餘年

戊申合祀天地于南郊赦天下

乙卯吏部尚書兼侍講林大鼐言武林江山之會大江
潮信一日再至頃者江流失道灘磧山移潮與洲鬪怒

號激烈一城為之不安枕雖詔守臣漕司專意堤埽日計營繕繞成即決不支年歲臣以為南至龍山北至紅亭二十里間乃潮勢奔衝之下流正迎敵受患之處雖繕治無益也望選歷練諳達之士專置一司博詢故老講究上流利病古今脉絡而後興工或者以謂錢塘之潮應有神物主之葺廟貌建浮屠付之有司此亦易事時六和塔壞又伍員祠以火廢故大禹及之輔臣進呈上曰恐浸淫為害可令乘冬月水不泛溢時治之為易

又舊有塔廟陰以相之雖出小說亦不可廢宜付禮部

看詳

熊克小歷先是林大鼐在言路嘗奏錢塘江浸淫為害十一月壬寅上諭宰執云云日歷十一月二

十五日乙卯常朝宰政進呈吏部尚書兼侍講林大鼐劉子武林江山之會云云上曰大鼐所奏可令臨安府同轉運司措置禮部看詳不知克何以差互如此

丁巳秦檜進呈起居舍人林機輪進故事不務論思獻納專懷怨望詔與外任乃以機知信州上因語及龐翼教人學道如機者信其邪說遂忘上下之義機既出外如翼者本軍中人亦不可留在此為士大夫尚以邪說

動之何況軍伍中也

雁翼事未見當考

太常卿兼權戶部侍郎

徐宗說權尚書戶部侍郎宗說頗有心計吏不能欺

然附秦檜以至從官常為檜營田產時人因目宗說為

莊客

熊克小歷誤載宗說乞令州縣補常賦在此年今移入二十三年閏十二月丙午中興聖政呂中

大事記曰徐宗說為戶侍為檜營田產時人目之為莊客而侍從皆其私人矣是日忠州團

練使知虔州李耕引兵入城虔州平時諸軍既集而江

西馬步軍副總管劉綱右宣教郎統押池州土豪鄉兵

鄧酢皆在兵間耕招降不聽率諸軍登城收叛卒盡誅

之翌日輔臣進呈上曰朕思虔賊閉城已四十日城中

乏食可諭楊存中速令濟師庶幾良民得免困苦於是

遣前軍統制苗定等率兵五千馬四百往聽耕節制定

等未至聞賊平乃還

熊克小歷載李平虔州在此月乙卯按日歷稱賊自七月乙卯竊發

至十一月丁巳收復凡一百十二日今從之

賊之始作也其徒侵軼旁郡或

勸左朝散郎南安軍居住張九成徙避之九成曰吾謫

此邦死分也何避焉守貳拒賊未得計請於九成曰此

為廣南要衝失守則郡以南皆賊區策將安在九成曰

僻小寡弱難與爭鋒今聞賊寨水南夜募善泅者火攻之俾其衆驚擾則宵遁必矣用其策賊果散走賊之未平也右宣教郎知醴陵縣鮮于廣曰是五日可至吾邑告于府請以所部兵列境上留民租於縣以為食提點刑獄司復命五里建一樓民持更其上廣曰是當為六十八樓重費民不可且盜必從官道來耶獨取鄉保伍之壯者選其豪六十領之它盜亦不敢犯廣晉原人也戊午右武大夫和州防禦使帶御器械楊公恕落階官

與在外宮觀以公恕自言遭遇二十六年除隨龍推恩
外即不曾非泛稍霑恩霈故也 資政殿學士知建康

府楊愿薨先是愿守宣城其表弟王炎調蘄水令徃見
之醉中偶謂愿曰昔嘗於呂丞相處得公頃歲所通書
其間頗及秦丞相之短尚記憶否愿聞之色如死灰自
是留炎不得去炎患之會愿移守金陵燕監司大合樂
守卒皆怠炎即青溪得客舟而去愿覺既失炎憂撓成

疾至是薨炎安陽人競弟也

競已見紹興二
十年十二月

十有二月辛酉朔詔歲減夔路及蒲江消井兩監鹽錢

八萬二千緡有奇

夔路鹽每斤減二十錢共為二萬七千餘緡事初已見十七年蒲江減四

萬四千餘緡消井元額八萬七千餘緡今減八分之一

昭信軍節度使知大宗

正事權主奉濮安懿王祠事士侗言久在疾告願上大

宗正印及主奉職事從之

癸亥封劉才人祖母太安人耿氏為咸寧郡夫人吳才

人母裴氏為齊安郡夫人以二才人進封特推恩也

乙丑直秘閣韓膺胄知太平州代還言州縣小吏喜怒

自私驅無罪之人不白長官而繫于獄謂之寄禁望申
嚴按察詔刑部立法申省

己巳右通直郎林一飛為樞密院編修官 詔睿思殿

祇候使臣自今增二人舊以二十人為額至是以慈寧
殿使臣二人兼充故也 中亮大夫建州觀察使韓京

提舉台州崇道觀 太尉安慶軍節度使提舉萬壽觀
邢孝揚薨謚忠靖

癸酉殿中侍御史魏師遜言近士子有因守令親識旋

置田產臨時便作本貫應舉或守臣直以他處士子姓名冒令教官以次保明望申飭州縣仍令監司按劾其士子冒貫得舉亦乞嚴賜行遣詔禮部措置申省

戊寅進士王積特補右迪功郎積父雱以右奉議郎通判興國軍而死積上書乞推恩上曰此王雲之姪雲奉使極效忠率先衆人勤事而死於難兼係潛藩之舊理宜優卹乃有是命

壬午左奉議郎楊傑直祕閣主管佑神觀

癸未秦檜進呈四川總領所申諸路欠紹興十七年以前折估糴本等都計錢引一百二十九萬餘緡米九萬八千餘石綾絹一萬餘匹雖已權住催理終是掛欠恐州縣別立名色暗行拘催欲乞盡行蠲放從之

按十七年以前

官物久已蠲放不知本所何以方有陳乞當考

丙戌太師秦檜辭免進大宗正司勅加恩詔封其次孫女為和國夫人孫女夫將仕郎吳益為右承務郎

丁亥免解進士袁敏求杖脊送海外州軍編管坐撰語

言故也上曰小人妄生是非既得其罪當行遣以為惑
衆者之戒

戊子金主使太子詹事張利用廣威將軍尚書兵部郎
中兼四方館副使諾延溫都子敬來賀明年正旦

是歲宗室子賜名授官者十有八人 諸路斷大辟十

六人 福州舊法民歲輸錢而受鹽於官其後不得鹽
而輸錢如故民多私鬻以給食而官亦不問至是龍圖
閣直學士張宗元知州事始再榷鹽犯法者滋多人不

以爲是

二十七年三月甲申所書可參考

安撫司屬官胡憲上書於宗

元告以爲政大體宗元不悅久之憲請獄祠而去



建炎以來繫年要錄卷一百六十三

建炎以來繫年要錄卷一百六十三金人地名考證

諾延

原書作搨盤與金
史同並誤今改正

